

ցեալ, ուրեմն մի լինիցի զարմանք և ոչ ընդ դէմ
կամաց ընթերցողիդ, զի ես աղաչելով 'ի յայսմ
առ ամենայն ընթերցողք սմայ և լսողք զի մի
նախանձեսցի 'ի վերայ գրեցելոյ իմոյ և մի ա-
րասցէ զիս անարժան 'ի բարի գործութենէ յայս-
մանէ 'ի պատճառն, թէ զի արդ յինքն ընթեր-
ցողն յառաջագոյն ոչ գրեաց, այլ ես մի 'ի փոք-
րականց ձեր մարդ գոլով թէպէտ ճանաչելով
բնական բնութիւնն իմ, որպէս 'ի վեր պատմեցի,
այլ ես ոչ կարեմ փախչիլ 'ի բնութենէ մարդոյ
և ոչ ուրանալ ներգործութիւն բնութեան իմոյ,
և հասարակապէս բնականի, եթէ ոչ խոստովա-
նիմ առաջի Աստուծոյ և ձեր արդարն, զի ներ-
գործութիւն իմոյս փոփոխական բնութեան 'ի
վերայ այս մտածութեան ոչ շաղախեցաւ 'ի
ցանկութիւն ինչ, զի խորհիցեմ զիս իբր իմաս-
տուն և կամ առաջակայ և գիտուն և կամ արա-
րից բանն իմ այն, որ այլ ոք ոչ կարեն առնել.
քաւ մի լիցի, եթէ ոչ այն քան համարձակեցայ
մինչև 'ի միտս իմ հաւանեցայ, զի եղբարք իմ
որդիք Հայոց մոռացեալ են 'ի միտս իւրեանց
առնելոյ հնարքն փրկելոյ զանձինս իւրեանց 'ի
ծառայութենէ այլ ազգաց, 'ի պատճառէ վաղըն-
ջոց կալով ներ լծոյ ծառայութեան՝ գուցէ ու-
սեալ իցեն նոքայ ծառայական կենաց, և ամե-
նայն երկայն ժամանակաւ ուսմունք լինիլ կարէ
իբր բնութիւն մարդոյ, և թուի ինձ զի ունիմ